

# Di Dräckbirschta, di Gglänzbirschta, d Schüowiggsi

14

Walliser Bote  
Mittwoch, 16. Oktober 2019

## und di Politik



Dräckbirschta    Glänzbirschta    Schüowiggsi    farbloosi Schüogreem



**Hitu keere wier du Peter Kuonen, waa in der Taleya / Laalu geboru, z Laalu zer Schüel ggangu ischt und jezz z Urdorf / Zürich wonnt.**

Är het iisch uf discher Sita schoo äs parrmaal gschribu, vor allem uber Wallisser Üswanderer. Grad letschthi het är im Rottu Verlaag äs Büöchji «Härdibulljo» üssaggä, wa mit de Zeichnige va der Barbara Seiler ganz güet achcho ischt. Da dri cha mu vill

aalts und güets Wallisertitsch finnu, aber öü no mängsmaal lachchu. Das Büechji cha mu no immer im Rottu Verlaag beschtellu: (rottenverlag@mengisdruck.ch).

Hitu chunnt der Peter embizz uf Schtrumänti und Faarbe va de Politiker z redu. Eiguntli meint är aber vor allum di Politiker sälbscht, waa zwaar meinunt, schi siigi di beschtu, wie der Peter aber zeicht, sus nit bidingiglos sind. Lose wer jezz emaal!

**Va Birschte, Wiggsi und Schüo**

Birschte und Wiggsi sind Strumenti, di mu fer ds Schüobuzzu brüücht, so dass di Tschaagge öü im allerunnerschtu Teil än prächtigi Fassung machund. Dene wa no nie hend Schüo gibuzzt, wellti churz erkläru, wiä mu di Birschte und d Wiggsi isezzt, soo dass schii äs blizzblanks Schüowäärch hend. Chundsami im Schüobuzzu hän i, schliessli bin i als ä junge Piffil än Botsch z Zermatt im Hotel Wiishooru und

WB, 16.10.2019/1

ä Summerseso dernaa im Hotel Breithooru (hizzutagsch Mägg Donald), Portie gsii. Morgu fer Morgu hän i minner wa nit zwei bis drii Duzzund Schüo gibuzzt und daadermit än äns Jätti Triichgäald gmacht.

Alabonöör, das isch miini Metooda, fär äs süpärbs Schüowäärch. Mit dr Dräckbirschtschta tüot mu fäin süüberli dr Schtöüb und Dräck vam Schüo äwägbuzzu. Dernaa brüücht mu Schüowiggssi. Dii chunnt mit ma chleinu Birschtschi ganz gitrungg in ds Läder igshmirt und igsalbot. De cha mu äs Schuzzji erliwwe bivor de di Glänzbirschtschta zum Isazz chunt. Mit dera wird uf m Schüo ggeribu und poliert bis mu schiis Gsicht im Läder cha schpieglu. Äänli wie uf m Händy.

### Und was sellund di Sachche mit dr Politik z tüo hä?

Än äns Pätsch mee, als jezz ä Hüüfo deichund. Uf dr politischu Büüna wäärdund nit säältu Politiker uf alle Schtuufu verdräkkot und agschwerzt. Sälberschtändli gäältot das öü fer Politikerine. Dr eifachheitshalber bliibi bi dischum Artiki bi dr männlichu Form. Merssi, liebi Frowwe, fär ds Verschtändnis.

Fer di Agschwerztu hilft de im Endschadium villfach weder än Dräckbirschtschta, um dr akit Dräck äwägg z birschtschu, no än Glänzbirschtschta um schich daadernaa wider einigermaassu glänzund z präsentieru. Mu het ne, bildlich gschprochchu, mit schwaarzer Schüowiggssi dr Grind igshmirt, äänli wiä dr Ggoschtantä schiine Schpiler, ä nei, ich meu natiirli schiine Trainer. Und wenn sch de ob all der Verggläffjuta gwagglund, git mu ne de eifach än Schüo ins Fittlo! Ob d Vollschtrekker sälber dräkkigi Schüo hend oder ob dii hoochglänzund sind, schpillt de fer denu wa dr Schüo in Arsch bercho het, kei Rolla mee. Är isch de nit säältu politisch erledigt, ob birächtigt oder unbirächtigt. Demm sellti schich jede Politiker (und Trainer bim FC Sion) biwusst sii, bivor är schiini Tschaagge uf ds politisch Parggett (ins Turbio) sezzt.

### Di Dräckbirschtschta

Miiner Meinig keert di Dräckbirschtschta genauoo in jedu Hosusack va ma Politiker wie dr Schnüzzlumpo. Wird er va irgend epper, va irgend äswaa verdräkkot, het r di Dräckbirschtschta eiswäggsch zer Hand und cha vliicht dr Dräck äwägg birschtschu. Sälberschtändli git s Politiker di kümrrund schich nit um di Dräckschlöüdrer, di tient je nach Umschtänd lieber sälbscht twittrundu Dräck schlöüdru als birschtschu. Das isch de wäärlu waar, susch fräaged ämaal dr Tramp! Apropro «birschtschu», passet de uf mit m Gibrüüch va dem Tätigkeitswoort, das het de öü im Wallisertitsch zwei verschidni Biditige. Wenn r di Differänz nit kenne, so fräaged ämaal dr Tramp...

### Di Glänzbirschtschta

Das isch d Lieblingsbirschtschta va hüotjochte Politiker. Di Glänzbirschtschta brüüchund schii am Morgu no vor m Schiffu und Tuschschu. Jede will blizzu, egaal ob r linggs, rächts oder in ner Mitti politisiert. Schiints heigi fascht jede Politiker meereri Glänzbirschtsche. Eini deheimu, eini im Auto, eini am Arbeitsplazz und sumi Gheiraatnuti heigi schiints sogar än Glänzbirschtschta bi dr Freundin deponiert! Das isch de wäärlu waar, susch fräaged ämaal dr, dr ... jezz chunt mer gat kei Namu in Si.

### D Schüowiggssi

D meischtgibrüüchtosch Schüowiggssi siigi schiints d schwaarza. Da bin i mer aber de nit äsoo sichher, ob das züotriift. Sowit dass ich weiss, brüüchund bischbilswiis Europaparlementarier höüpsächli faarbloosi Schüoggreem. Ier heid richtig gläsu, nit Schüowiggssi, di Ggreemer brüchund Schüoggreem. Äs soll aber öü unner deer Gilde vereinzelt durchgwiggsti Politiker mit Egge und Kante gä, wa iri Schüo mit schwaarzer Schüowiggssi isalbunt. Dii wellund iisch Schwizer RAMUgnääti Schüo üfzwingu... Das macht iische Parlamentarier und de Bundesrää Chopferbrächchu und schii chennund schi nit entscheidu fär derfir oder dergägu. Härdibulljo, mächet in dr Sach endli virschi und entscheidet eww, fer was öü immer!

Aber öü z Bääru und z Sittu soll s schiints scho vorcho sii, dass wäärund de Sessioone farbloosi, Schüowiggssi üsverschöüfti si gsii. Grieni Schüowiggssi wird in Züokunft vor Waale schee gfräagti sii und im Priis gottserbärmli schtüigu. Äs soll aber durchgwiggsti Politiker gä, wa di grie Schüowiggssi scho bizitu zu ma ginschtigu Priis ichöüfund, aber de eerscht wäärund m Waalkampf numu churzzeitig daadermit salbund und schmirund. Ich meu de in dischum Fall nit appa grieni und grioliberali Politiker.

### Und de no das...

Im Bundeshüs bhöüpte schiints linggi und nätti Müüler, dass d Mitglider va einer Fraktioo d Schüowiggssi nit mit ma chleinu Birschtschi ins Läder va ire Schüo ischmire und isalbe. Dii shtelle schich schiints bi Fraktioonssizzige früo am Morgu in einer Linia üf. Mit m Finger tiegi sch än Pfludreta schwaarzi Wiggssi uf d Vorderschüochappa und de faare ne än Blocher uber d Schüo. Porggalädi - Köpfchen! Zwei Arbeitsschritta in inum: igwiggst und z gliichum mee oder weniger gigglänzt! Ä Schelm, wer Beeschs deicht (... oder an a bschtimmi wurmschtichchigi Partii).

### SCHWEERI WEERTER

**akiju/akit:** anwerfen/angeworfen  
**Alabonöör!** Nun gut!  
**Blizzu s:** Glänzen  
**Schuzzji s:** Weile (kurz)  
**Chundsami w:** Kenntnis, Geschick  
**daadernaa:** danach  
**durchgwiggst:** schlau, durchtrieben  
**eiswäggsch:** sogleich  
**erliwwe:** ausruhen, Pause machen  
**Fassung s:** Aussehen  
**fluggsch:** sofort, umgehend  
**gitrungg:** fest  
**Ggoschtantä m:** Als CC bekannter Fussballpräsident  
**Gheiraatnuti Mz:** Verheiratete  
**hüotjocht:** überheblich  
**gwagglu:** wackeln  
**Härdibulljo:** Aufgepasst!  
**Jätti w:** Grosse Menge  
**minner wa nit:** mehr oder weniger  
**Pätsch m:** Grossmenge  
**Pfludreta w:** Kleine Masse  
**Porggalädi!:** Erstaunen: Schau mal einer an!  
**Piffi än Botsch:** Grösserer Bube  
**Ramugnääti:** rahmen-genähte Schuhe; vgl. Rahmenvertrag  
**Schiffu:** urinieren  
**Schnüzzlumpo m:** Taschentuch  
**Tiri s:** Türe  
**Tramp m:** Trump mit a...  
**Tschaagge Mz:** Beine  
**tschennt:** schön, vornehm  
**twittrundu:** twitternd (Kurz-nachrichten Tweets)  
**Verggläffjuta w:** Verleumdung  
**vergläffju:** verleumden  
**virschi:** vorwärts

WB, 16. 10. 2019/2

**WALLISERTITSCH**

## ESOO SÄGE WIER

### «Über ds Wätter flüech und andri Lit, gseet me schiini Sinde nit»

Wallisser Schprichwoort

Wörtlich übersetzt heisst dies: Wenn man über das Wetter flucht und andere Leute, sieht man seine eigenen Sünden / Fehler nicht.

## ESOO WEERI S RÄCHT GSI

Jaa, was biditet das uf Güettitsch?

**1. züetäppisch:** Wer züetäppische ischt, deicht nur an schiine eigend Vorteil. Er ist also eigensüchtig oder egoistisch. Dass er dabei aufdringlich wirkt oder erscheint, ist offensichtlich.

**2. schporrfädig:** Dieses Wort aus Visperterminen bedeutet, sehr aufgeregt zu sein, ja auch ängstlich besorgt zu sein: Är ischt schporrfädigä: Er ist aufgeregt, ein bisschen ausser sich.

Und wie seit me fer das uf Wallisertitsch?

**1. Dachtraufe:** Dies heisst Tröüffi. Man versteht darunter einmal das vom Dach fallende Regenwasser. Die Tröüffi wird normalerweise durch den Schporrchännel aufgefangen. Andererseits bezeichnet man auch den trockenen Raum unter dem vorragenden Dach als Tröüffi.

**2. schimpfen:** Hierzu kennt unsere Mundart sehr viele Worte: fuchte, futtere, gginte, läärme, kappittle, sakramentiere, schnerze, schpetackle, sirachche, surre, tobe, tobi-niere, unaarte, useiju, üs-huddle, mettine und scharmiziere. Vielleicht kennt jemand noch mehr solche Worte?

## EPPIS NIWWS FER Z RAATU

Wie seit me fer das?

**Was biditet uf Güöttisch:**

**1. Wort:** rangaglig?

**2. Wort:** schadliem?

**Wie seit me uf Wallisertisch fer:**

**1. Wort:** Kuhkettensicherung an der Futterkrippe?

**2. Wort:** schnell laufen?

## UND EWWERS GSCHICHTJI

Schriibet öü!  
Wenn ler en Erinnrig us Ewwem Läbe, es Erläbnis, es Gschichtji, e Zelleta oder e Sag, es Schprichwoort, Wizza, es Gidicht oder suscht eppis wisst, waa ler kännet und waa öü fer andri intressant wääri, so schriibet iisch. Wier hätti Platz fer Ewwer Biiitrag. Es sellti appa bis 70 Ziile sii – z. B. anderthalb Schribmaschschiiinese Arial 12 Punkt. Ier chennt öü in Handschrift schriibe. Wier tie schi de schoo in de Kompiuter dri. D Adräss heisst:

**lisch Schpraach  
Neuweg 2  
3902 Brig-Glis  
aloes.grichting@gmail.com**

Und vergäset nit, es Foto va Eww derzue z tüe, dass mu di, wa schriibent, öü gseet. Gäbet öü, wenn ler heit, zwei Foto oder Abbildige, waa z Ewwem Text passent! Wier chänne de öü Foto derzue und va Eww sälber cho machche. Danke no fer intressanti Weerter, Schprichweerter und Redewendige! Und heit alli zäme e güeti Zit!

**Alois Grichting**



Peter Kuonen, Lalden/Urdorf

WB, 16.10.2019/3